

Na osnovu člana 18. stav 1. točka b. Ustava Kantona Sarajevo ("Službene novine Kantona Sarajevo", br. 1/96, 36/96, 16/97, 14/00), Skupština Kantona Sarajevo, na sjednici od 10. maja 2001. godine, donijela je

ZAKON O SPORTU KANTONA SARAJEVO

I – OSNOVNE ODREDBE

Član 1.

Ovim zakonom se uređuju osnovna načela sporta, organiziranja sportskih aktivnosti i učesnici u sportu, prava i obaveze sportaša, stručni kadar, sportski objekti i zdravstveni nadzor, matične evidencije, ostvarivanje javnog interesa Kantona Sarajevo (u daljem tekstu: Kanton), Grada Sarajeva (u daljem tekstu: Grad) i općina sa područja Kantona (u daljem tekstu: općina) u sportu i druga pitanja od značaja za sport.

Član 2.

Svi građani (djeca, omladina, odrasli) imaju pravo da provode sportske aktivnosti na bazi interesa i dobrovoljnosti u skladu sa odredbama ovog zakona i međunarodnim konvencijama, a naročito: Konvencijom o pravima djeteta, Konvencijom o antidoping kontroli, Konvencijom o suzbijanju nasilja i nedoličnog ponašanja gledatelja na sportskim priredbama, posebno na nogometnim utakmicama.

Odredbe ovog zakona odgovarajuće se primjenjuju na građane sa tjelesnim oštećenjima i onemogućenostima.

Član 3.

Organizatori i učesnici u sportskim aktivnostima su obavezni da razvijaju duh olimpizma, podstiču fer plej, suzbijaju nasilje, doping i sve vidove nesportskog ponašanja.

Član 4.

Sport u smislu ovog zakona obuhvata:

- sportski odgoj i obrazovanje,
- sport za sve,
- razvojni sport.
- vrhunski sport.

Član 5.

Sportski odgoj i obrazovanje u smislu ovog zakona je sportska aktivnost djece i omladine koja se obavlja u nastavno obrazovnom procesu na svim nivoima obrazovanja (predškolsko, osnovno, srednje i visoko ili izvannastavno obrazovnog procesa neovisno o obliku pojavljivanja).

Sport za sve u smislu ovog zakona je organizirana ili samoorganizirana sistemska sportska aktivnost svih građana.

Razvojni sport u smislu ovog zakona je priprema i takmičenje pojedinaca i ekipa koji su svojim stručnim i organizacijskim mogućnostima prevazišli sport za sve, a nisu ostvarili vrhunski sportski rezultat.

Vrhunski sport u smislu ovo zakona je priprema i takmičenje pojedinaca i ekipa koji su na najvećim međunarodnim takmičenjima ostvarili vrhunski rezultat.

Član 6.

Pod sportskim aktivnostima u smislu ovog zakona podrazumijeva se naročito:

- priprema za takmičenje (trening),
- sudjelovanje u sportskim takmičenjima,
- poslovi lica koja obuhvaćaju (pripremaju) sportaše,
- poslovi organiziranja i vođenja sportskih priredbi,
- poslovi upravljanja sportskim objektima.

II – ORGANIZOVANJE SPORTSKIH AKTIVNOSTI

Priprema i sportsko takmičenje

Član 7.

Organiziranje sportskih aktivnosti iz člana 6. al. 1. i 2. mogu provoditi sva domaća i strana pravna i fizička lica kao privrednu ili neprivrednu djelatnost.

Pravna lica iz prethodnog stava mogu se osnivati u svim oblicima svojine.

Organizacije u sportu

Član 8.

Organizacije u sportu, u smislu ovog zakona, su: klub, sportsko društvo i udruženje sportskih organizacija – sportski savez, koje se osnivaju u skladu sa odredbama posebnog zakona.

Klub je osnovna organizacija u sportu, koja se može osnivati kao udruženje građana ili privredno društvo, a za organiziranje sportske aktivnosti iz člana 6. al. 1. i 2., odnosno za stvaranje uvjeta za učešće sportaš u sportskim takmičenjima utvrđenim pravilima odgovarajućeg sportskog saveza.

Sportsko društvo je udruženje klubova različitih sportskih grana.

Sportski savez je udruženje klubova obrazovano na teritorijalnom principu ili u okviru određene sportske grane radi obezbijedenja podrške i usluga klubovima čije sjedište se nalazi na teritoriji Kantona.

Član 9.

Klubovi mogu osnivati ili udruživati se u odgovarajuće saveze i sportska društva na području Kantona.

Klubovi sportska društva i savezi iz prethodnog stava mogu se udružiti u Sportski savez Kantona.

Sportski savez Kantona može se udružiti u Sportski savez Bosne i Hercegovine.

Udruživanje u saveze vrši se ugovorom kojim se određuju međusobna prava i obaveze.

Član 10.

Organiziranje sportskih aktivnosti iz člana 6. al. 1. i 2. može provoditi organizacija u sportu pod uvjetom da obezbijedi odgovarajući stručni kadar, sportski objekt, planiranje i evidenciju stručnog kadra, vođenje matičnih evidencija, zdravstveni nadzor i održavanje reda za vrijeme takmičenja.

Privredna društva u sportu

Član 11.

Za provođenje sportskih aktivnosti iz člana 6. al. 1. i 2. ovog zakona, domaće i strano pravno i fizičko lice može osnovati privredno društvo u skladu sa zakonom kojim se uređuje rad privrednih društava. Odnosi između osnivača i privrednog društva, iz prethodnog stava, uređuje se ugovorom, u skladu sa aktom o osnivanju.

Član 12.

Privredno društvo u sportu može početi sa radom na osnovu rješenja kantonalnog ministarstva nadležnog za sport (u daljem tekstu: Ministarstvo) kojim se utvrđuje da su ispunjeni uvjeti iz člana 10. ovog zakona i daje odobrenje za obavljanje djelatnosti.

Zahtjev za izdavanje rješenja podnosi osnivač najkasnije 30 dana prije početka rada privrednog društva.

Član 13.

Za direktora privrednog društva u sportu može biti imenovano lice, koje pored općih uvjeta za osnivanje radnog odnosa ima najmanje srednju stručnu spremu i tri godine radnog iskustva u sportu.

Direktora privrednog društva u sportu imenuje osnivač na osnovu javnog konkursa na period od četiri godine.

Član 14.

Kada Ministarstvo utvrdi da privredno društvo ne ispunjava uvjete u smislu člana 12. stav 1, ovog zakona, odrediti će rok u kojem osnivač mora otkloniti utvrđene nedostatke. Ukoliko nedostaci ne budu otklonjeni u ostavljenom roku, Ministarstvo nalaže osnivaču donošenje akta o prestanku rada privrednog društva.

Ako osnivač ne donese akt o prestanku rada privrednog društva, u roku od 30 dana podnošenja prijedloga, Ministar može rješenjem oduzeti odobrenje za obavljanje djelatnosti iz člana 12. stav 1. ovog zakona i podnijeti zahtjev nadležnom sudu za donošenje odluke o prestanku rada privrednog društva.

Ustanove u sportu

Član 15.

Kanton, Grad i općina može osnovati javnu ustanovu u državnoj svojini za provođenje poslova iz člana 38. ovog zakona.

Domaće i strano pravno i fizičko lice može osnovati ustanovu za provođenje poslova iz prethodnog stava.

Ustanove iz st. 1. i 2. ovog člana mogu se osnovati pod uvjetima utvrđenim posebnim zakonom.

Član 16.

Za direktora javne ustanove u sportu može biti imenovano lice, koje pored općih uvjeta za zasnivanje radnog podnosa, ima visoku stručnu spremu i tri godine radnog iskustva u sportu.

Direktora javne ustanove u sportu imenuje upravni odbor na osnovu javnog konkursa, na period od četiri godine, uz suglasnost osnivača.

Direktor javne ustanove u sportu imenuje se na četiri godine u skladu sa zakonom kojim se uređuje rad ustanova.

Sportske priredbe

Član 17.

Sportske priredbe, u smislu ovog zakona, su organizirani sportski susreti i takmičenja u sportu u skladu sa općim uvjetima koje propisuje odgovarajući međunarodni sportski savez.

Velike međunarodne sportske priredbe su: olimpijske igre, mediteranske igre, univerzijade, svjetska i evropska prvenstva, finale svjetskih i evropskih kup takmičenja.

Član 18.

Organizacije u sportu koje se kandidiraju za organiziranje velikih međunarodnih sportskih priredbi, na području Kantona Sarajevo moraju:

- dobiti prethodnu suglasnost Skupštine Kantona na prijedlog Vlade Kantona za podnošenje kandidature kod odgovarajućeg međunarodnog sportskog saveza;
- dobiti suglasnost odgovarajućeg sportskog saveza na državnom nivou, Sportskog saveza BiH ili Olimpijskog komiteta BiH;
- utvrditi inicijativno tijelo za cjelokupnu pripremu;
- izraditi i predložiti Ministarstvu elaborat o organiziranju i financiranju sportske priredbe.

Obaveze iz prethodnog stava odnose se na sve velike sportske priredbe, čak i ako je organizator sam osigurao sredstva.

Bliže uvjete za organiziranje sportskih priredbi na području Kantona uređuje Ministar nadležan za sport (u daljem tekstu: Ministar).

Kad se Grad ili općina kandidiraju za organiziranje neke od velikih međunarodnih priredbi iz člana 17. ovog zakona, a za njenu organizaciju potražuju sredstva iz kantonalnog budžeta, u prilogu zahtjeva za davanje prethodne suglasnosti Skupštine Kantona obavezno dostavlja dokaze o ispunjenju uvjeta iz al. 2. do 4. stava 1. ovog člana.

Član 19.

Sistem sportskih takmičenja utvrđuje se općim aktom odgovarajućeg sportskog saveza, u skladu sa oblikom sportskih takmičenja na državnim, evropskim i svjetskim prvenstvima ili olimpijskim igrama.

U sistemu sportskih takmičenja učestvuju klubovi u okviru odgovarajućeg sportskog saveza, pod uvjetima i na način utvrđen općim aktom tog saveza.

Klubovi, sportaši i svi drugi učesnici sportskih aktivnosti dužni su da surađuju sa organizatorom i ne smiju svojim postupcima izazivati ili doprinosti nasilju ili nedoličnom ponašanjem gledatelja.

III – SPORTAŠI

Član 20.

Sportaš, u smislu ovog zakona, je građanin registriran pri sportskom savezu, a koji u klubu amaterski ili profesionalno provodi stručno usmjerene tjelesno vježbanje, učestvuje u sportskom treningu ili na sportskim takmičenjima.

Sportaš iz prethodnog stava, zavisno od rezultata koje postiže, rangira se u svjetsku A ili B klasu, internacionalnu A ili B klasu, perspektivnu A ili B i nacionalnu A ili B klasu.

Zaslužnim sportašem sa teritorije Kantona smatra se sportaš koji je kategorisan u svjetsku A klasu.

Vrhunskim sportašem sa teritorije Kantona smatra se sportaš koji je kategorisan u svjetsku B klasu ili internacionalnu A klasu.

Ministar donosi pravilnik o kategorizaciji zaslužnih, vrhunskih i ostalih sportaša prema ostvarenim rezultatima.

O posebnim javnim nagradama i priznanjima zaslužnim sportašima odlučuje Skupština Kantona.

Član 21.

Sportaši mogu provoditi sportske aktivnosti u vidu zanimanja u skladu sa pozitivnim propisima.

Aktivnosti sportaša iz prethodnog stava reguliraju se ugovorom o radu sa klubom.

Ugovor o radu iz prethodnog stava sadrži posebno: međusobna prava i obaveze, obavezu zdravstvenog i penziono-invalidskog osiguranja sportaša, rok angažiranja, visinu naknade za angažman, a može i visinu naknade za zaključenje ugovora.

Član 22.

Klub u skladu sa zakonom i statutom, sportašu koji sportske aktivnosti ne provodi u vidu zanimanja, osigurava pravo na zdravstvenu zaštitu ako ga ne ostvaruje po drugom osnovu, te opremi i rekvizite.

Klub, u skladu sa zakonom, obavezan je vrhunskom i zaslužnom sportašu, koji ne ostvaruje prava iz penziono-invalidskog osiguranja po drugom osnovu, uplaćivati doprinose za penziono-invalidsko osiguranje za vrijeme za koje se takmiči sa tim statusom.

Član 23.

Sportaši ne smiju uzimati, niti im se smiju davati stimulativna i doping sredstva.

Zabranjeno je sportaša izlagati sportskim aktivnostima, ako one mogu ugroziti ili pogoršati njegovo zdravstveno stanje.

Sportaši koji učestvuju u pripremama za sportska takmičenja i u sportskim takmičenjima dužni su najmanje dvaput godišnje da se podvrgnu utvrđivanju opće i posebne zdravstvene sposobnosti u skladu sa pravilnikom iz člana 35. stav 1. ovog zakona.

Sportaši, organizacije u sistemu sporta i nadležni zdravstveni radnici moraju poštovati pravila Evropske konvencije o antidoping kontroli i pravila Međunarodnog olimpijskog komiteta.

IV – STRUČNI KADAR

Član 25.

Stručnim kadrom, u smislu ovog zakona, smatraju se lica sa višom ili visokom stručnom spremom osposobljena na fakultetu, drugoj visokoj ili višoj školi za sport.

Stručnim radom u klubovima rukovodi stručni kadar iz stava 1. ovog člana.

Bliže uvjete u vezi sa stručnom spremom stručnog kadra propisuje Ministar.

Član 26.

Stručni rad u sportu obuhvata: obuku, planiranje, programiranje i vođenje tjelesnog vježbanja, istraživačko- razvojni, stručno-savjetodavni rad, stručno osposobljavanje, informaciono-dokumentacionu djelatnost, izdavačku djelatnost i popularizaciju sporta.

Član 27.

Klub zaključuje ugovor o radu sa stručnim kadrom u skladu sa zakonom.

Ugovor o radu sadrži naročito: međusobna prava i obaveze, obavezu zdravstvenog i penziono-invalidskog osiguranja, rok angažiranja, visinu naknade za angažman, a može i visinu naknade za zaključenje ugovora.

V – SPORTSKI OBJEKTI

Član 28.

Sportski objekti, u smislu ovog zakona, su izgrađeni ili prirodni objekti namijenjeni sportu, koji ispunjavaju uvjete za održavanje treninga, takmičenja ili druge sportske aktivnosti.

U zavisnosti od namjene sportskih objekti moraju sadržavati odgovarajuće prateće prostore: sanitarne, garderobne, gledališne, servisne, spremišne i druge, a prema standardima propisanim od strane kantonalnih, federalnih, državnih, evropskih ili svjetskih sportskih asocijacija.

Član 29.

Sportski objekti, u zavisnosti od značaja i namjene, dijele se:

- objekte od značaja za općinu, odnosno Grad;
- objekte od značaja za Kanton;
- objekte od značaja za Državu.

Ministar donosi pravilnik o kategorizaciji i namjeni objekata od značaja za Kanton, Grad i općinu.

Član 30.

Nad sportskim objektima koji su u vlasništvu kantona pravo raspolaganja vrši Skupština kantona.

Skupština kantona može prenijeti na Grad ili općinu pravo upravljanja i korištenja nad pojedinim objektom ili objektima iz prethodnog stava.

Skupština Kantona može posebnim aktom odrediti sportske objekte nad kojim prenosi pravo upravljanja i korištenja na Grad, odnosno općinu ili organizaciju u sportu.

Kanton zadržava pravo nadzora nad vršenjem prava iz prethodnog stava, te ukoliko utvrdi da Grad, odnosno općine ne vrše prenesenu nadležnost na način određene aktom Skupštine kantona iz prethodnog stava, može to pravo oduzeti.

Član 31.

U vršenju prava raspolaganja, sportskim objektima Skupština Kantona, Gradsko ili općinsko vijeće može prenijeti, na osnovu konkursa, pravo upravljanja i korištenja nad tim objektima drugom pravnom ili fizičkom licu koje organizira aktivnosti u sportu.

Pravo upravljanja i korištenja prenosi se ugovorom, kojim se uređuju međusobna prava i obaveze, a naročito uvjeti kojima se obezbijeduje namjensko i racionalno korištenje, čuvanje i održavanje sportskih objekata.

Član 32.

Namjena sportskih objekata od značaja za Kanton, Grad i općinu ne može se mijenjati.

Izuzetno, u slučaju da Skupština kantona, Gradsko ili općinsko vijeće da suglasnost da se mijenja namjena sportskog objekta, Kanton, Grad odnosno općina je obavezna da obezbijedi objekt iste namjene.

Prostori u sastavu sportskih objekata i sportsko rekreacijskih centara, koji ne služe osnovnoj namjeni, mogu se koristiti za privredne i druge svrhe.

Član 33.

Vlasnik, odnosno lice koje upravlja sportskim objektom obavezno je da obezbijedi njegovo korištenje i održavanje u tehnički ispravnom stanju u skladu sa njihovom namjenom i posebnim propisima radi sigurnosti sportaša, gledatelja i drugih učesnika u sportskoj manifestaciji.

VI – ZDRAVSTVENI NADZOR

Član 34.

Pod zdravstvenim nadzorom podrazumijeva se obaveza kluba na:

- provođenju preventivne zdravstvene zaštite svih registriranih sportaša kroz kontrolne i periodične ljekarske preglede, osiguranje zdravstvenog nadzora u toku priprema za takmičenje i takmičenja;
- osiguranje sportaša od sportskih povreda;
- kontrolu uzimanja i davanja zabranjenih stimulativnih i doping sredstava sportašima.

Član 35.

Pravilnik o zdravstvenom nadzoru iz prethodnog člana donosi Ministar koji rukovodi kantonalnim organom uprave nadležnim za poslove zdravstva.

Kontrola uzimanja i davanja zabranjenih stimulativnih i doping sredstava sportašima vrši se na osnovu liste koju utvrđuje Medicinska komisija Međunarodnog olimpijskog komiteta ili odgovarajućeg međunarodnog sportskog saveza, odnosno asocijacije.

VII – MATIČNA EVIDENCIJA

Član 36.

Ministarstvo preko odgovarajuće sportske institucije vodi matične evidencije o sportu na području Kantona, i to:

- organizacija u sportu,
- sportskih objekata, zaslužnih i vrhunskih sportaša,
- registriranih sportaša po granama sporta, posebno talenata,
- stručnog kadra,
- rezultata završenih takmičenja prema kalendaru za pojedine grane sporta
- stručne literature u sportu,
- sportskih priredbi na području Kantona.

Vođenje evidencije, obrada podataka i informiranje u sportu vrši se u skladu sa ugovorom koji zakluče Ministarstvo i odgovarajuća sportska institucija.

Sadržaj i način vođenja evidencije iz stava 1. i 2. ovog člana propisuje Ministar.

Član 37.

Evidencije iz prethodnog člana se skupljaju, objedinjavaju i koriste za potrebe Ministarstva i druge korisnike u skladu sa propisima.

Zbirne godišnje evidencije iz prethodnog iz prethodnog člana trajno se čuvaju u Ministarstvu.

Organizacije, privredna društva i ustanove u sportu obavezno vode evidenciju iz člana 36, stav 1. al. 2. – 8. i o njoj dostavljaju podatke odgovarajućoj sportskoj instituciji.

VIII – JAVNI INTERES KANTONA, GRADA I OPĆINE U SPORTU

Član 38.

Javni interes Kantona u sportu je:

- izgradnja, obnova i održavanje sportskih objekata od interesa za Kanton,
- vrhunski sportski rezultat,
- usavršavanje stručnog kadra,
- razvojno-istraživačka i promotivna djelatnost,
- međukantonalna, međuentitetska i međunarodna suradnja,
- koordinacija ukupnih sportskih aktivnosti,
- evidencija,
- dodjela javnih priznanja i nagrada zaslužnim djelatnicima.

Javni interes Grada u sportu je:

- izgradnja, obnova i održavanje sportskih objekata od interesa za Grad,
- razvojni sport,
- organizacija sportskih manifestacija masovnog karaktera,
- sportski odgoj i obrazovanje u srednjim školama i fakultetima i fakultetima na području Kantona,
- usavršavanje stručnog kadra,
- suradnja sa Olimpijskim gradovima,
- evidencija za područje Grada.

Javni interes općine u sportu je:

- obnova i održavanje sportskih objekata od značaja za općinu,

- organizirani sport za sve, posebno u funkciji zdravlja građana, kao i preventive devijantnom ponašanju,
- razvojni sport sa opredjeljenjem na masovnost,
- sportski odgoj i obrazovanje u predškolskim ustanovama i osnovnim školama,
- evidencija za područje općine.

Grad i općina će svojom odlukom utvrditi način provođenja javnog interesa Grada, odnosno općine. Grad i općina mogu utvrditi i druge aktivnosti kao svoj javni interes, ukoliko osiguraju sredstva za njihovo ostvarivanje.

Član 39.

Radi ostvarivanje javnog interesa iz prethodnog člana i drugih interesa sporta, organi i službe općina i Grada nadležni za organiziranje i praćenje sportskih djelatnosti, obavezni su da surađuju međusobno i sa nadležnim organima Kantona.

IX – FINANCIRANJE SPORTA

Član 40.

Sredstva za osnivanje i rad organizacija, privrednih društava i ustanova u sportu obezbijeduje osnivač.

Organizacije u sportu stječu sredstva i od članarine i drugih izvora utvrđenih zakonom.

Ustanove u sportu mogu stjecati prihode i:

- prodajom intelektualnih i materijalnih dobara i usluga,
- iz prihoda po osnovu autorskih prava i patenata,
- iz legata, poklona i zaviještanja,
- iz drugih izvora.

Član 41.

Javna ustanova u sportu stječe sredstva za zadovoljavanje javnog interesa iz člana 38. ovog zakona, iz budžeta Kantona, Grada ili općine na osnovu pozitivnih rezultata ostvarenih u prethodnom periodu i godišnjih programa rada koji donosi u skladu sa poslovima i zadacima utvrđenim ovim zakonom.

Sredstva za zadovoljavanje javnog interesa iz člana 38. ovog zakona, iz budžeta Kantona, Grada ili općine može stjecati ustanova u oblasti sporta čiji je osnivač domaće pravno ili fizičko lice, ako se na taj način osigurava racionalnije korištenje sredstava i kvalitetnije obavljanje poslova i zadataka.

Međusobni odnosi Kantona, Grada ili općine i pravnih i fizičkih lica iz st. 1. i 2. ovog člana uređuju se ugovorom.

Član 42.

Kanton, Grad, odnosno općina izdvajaju budžetska sredstva za financiranje javnog interesa u skladu sa godišnjim programom rada i opredjeljenja Skupštine Kantona, odnosno Gradskog ili općinskog vijeća.

Ministar donosi pravilnik o kriterijima za financiranje javnog interesa iz stava 1. člana 38. ovog zakona.

Gradonačelnik, odnosno općinski načelnik, donosi pravilnik o kriterijima za financiranje javnog interesa iz stava 2. ili 3. člana 38. ovog zakona.

Član 43.

Organizacije u sportu čijim se programima ostvaruje javni interes obavezno dostavljaju Ministarstvu, gradskoj, odnosno općinskoj službi nadležnoj za sport, svoj program rada za narednu godinu, najkasnije do 30. oktobra tekuće godine.

Član 44.

Korisnici budžeta obavezno Ministarstvu, gradskoj, odnosno općinskoj službi nadležnoj za sport, dostavljaju redovan izvještaj o radu za prethodnu godinu, najkasnije do 31. januara tekuće godine.

Korisnici budžetskih sredstava iz prethodnog stava obavezni su da na zahtjev Ministra, Gradonačelnika ili općinskog načelnika dostavljaju poseban izvještaj o radu u roku od 15 dana od njegovog traženja.

Ukoliko korisnik ne dostavi izvještaj iz stava 1. i 2. ovog člana ili ga ne dostavi u navedenom roku, može se obustaviti dalje financiranje njegovog programa.

X – NADZOR

a) Nadzor nad zakonitošću rada

Član 45.

Nadzor nad zakonitošću rada organizacija u sportu, privrednih društava i ustanova u sportu, vrši Ministarstvo.

b) Inspeksijski nadzor

Član 46.

Nadzor nad provođenjem odredbi ovog zakona i propisa donesenih za njegovo provođenje vrši Ministarstvo putem inspektora sporta (u daljem tekstu: inspektor).

Inspeksijski nadzor, u smislu ovog zakona, obuhvata naročito:

- postojanje propisanih općih uvjeta za registraciju i djelovanje organizacija u sportu, privrednih društava i ustanova sporta,
- ispunjavanje uvjeta za obavljanje zadataka u sportu,
- obavljanje sistematskih i zdravstvenih pregleda,
- ispunjavanje propisanih odredbi pravila za organizaciju takmičenja,
- ostvarivanje prava sportaša i stručnih kadrova i sportskih organizacija,
- namjensku upotrebu novčanih sredstava,
- upravljanje i namjensku upotrebu sportskih objekata,
- vođenje propisane evidencije i dokumentacije,
- donošenje upravnih mjera i kontrolu njihovog provođenja u skladu sa posebnim zakonom koji se uređuje kantonalna uprava.

Član 47.

Za inspektora može biti postavljeno lice, koje pored općih uvjeta propisanih zakonom, ispunjava i posebne uvjete: završen fakultet sporta ili sportski smjer na drugoj visokoškolskoj ustanovi i tri godine radnog iskustva iz oblasti sporta.

Član 48.

Inspektor u vršenju inspeksijskog nadzora izdaje rješenje radi otklanjanja povreda odredbi ovog zakona.

Protiv ovog rješenja inspektora može se uložiti žalba Ministru, u roku od osam dana od dana dostavljanja rješenja.

Žalba protiv rješenja iz prethodnog stava ne odlaže njegovo izvršenje.

Član 49.

Organizacije, privredna društva i ustanove u sportu su obavezne da omogućće obavljanje nadzora u skladu sa Čl. 45. i 46. ovog zakona Ministarstvo može pokrenuti postupak kod nadležnog suda za prekršaje protiv organizacije, privrednog društva i ustanove u sportu, kao i odgovornog lica ako onemogućava provođenje nadzora iz prethodnog stava.

XI – KAZNENE ODREDBE

Član 50.

Novčanom kaznom od 1.000 do 10.000 Km kaznit će se organizacija u sportu i drugo pravno lice ako:

- onemogućiti provođenje upravnog nadzora (član 49. Zakona)
- počne sa radom bez rješenja kantonalnog organa uprave nadležnog za poslove sporta (član 12. stav 1.),
- ako ne utvrdi sistem sportskog takmičenja u skladu sa oblikom sportskih takmičenja na državnim, evropskim i svjetskim prvenstvima ili olimpijskim igrama (član 19. stav 1.),
- organizira aktivnosti u sportu bez odgovarajućeg stručnog kadra, sportskog objekta, planiranja i evidencije stručnog rada, vođenju matične evidencije (član 10. član 12. stav 1. član 125. član 28. i član 37. stav 3.),
- ne osigura održavanje reda i zdravstveni nadzor za vrijeme trajanja sportskog takmičenja i priredbe (član 10, i član 35. stav 1.),
- navede sportaša na upotrebu nedozvoljenih stimulativnih i doping sredstava (član 24. stav 1.),
- izlože sportaša aktivnostima koje mogu ugroziti ili pogoršati njegovo zdravstveno stanje (čl. 24. st. 2.),
- zaključi sa licem, koje ne ispunjava uvjet stručne spreme, ugovor o radu kao stručnim kadrom iz člana 25. i 27.
- promjeni namjenu sportskog objekta ili njegovog dijela bez prethodne suglasnosti (član 32. stav 2.),
- ne koristi i ne održava sportski objekt u tehnički ispravnom stanju u skladu sa namjenom i posebnim propisima, radi sigurnosti sportaša, gledatelja i drugih učesnika u sportskoj manifestaciji (član 33.),
- ne osigura provođenje zdravstvenog nadzora (član 34.),
- ne upiše se u matičnu evidenciju ili iz nje ne odjavi, ne dostavi izvještaj na način i u rokovima određenim ovim zakonom (član 36. 37. stav 3. i član 44.).

Za prekršaj iz prethodnog stava kaznit će se i odgovorno lice u organizaciji u sportu i drugom pravnom licu novčanom kaznom 100 do 1.000 KM.

Član 51.

Novčanom kaznom od 100 do 1.000 Km kaznit će se za prekršaj pojedinac ako:

- organizira sportske priredbe i sportska takmičenja suprotno propisanim uvjetima iz čl. 10. i 12. stav 1.
- navede sportaša na upotrebu dopinga ili da doping (član 24. stav 1.)
- promjeni namjenu sportskog objekta ili njegovog dijela bez prethodne suglasnosti (član 32. stav 2.),
- koristi sportski objekt suprotno namjeni i ne održava ga u propisnom stanju (član 33.).

XII – PRELAZNE I ZAVRŠNE ODREDBE

Član 52.

Ministar je dužan da donese propise iz člana 18. stav 3. člana 20. stav 5. člana 25. stav 3 člana 29. stav 2. člana 36. stav 3. i člana 42. stav 2. ovog zakona u roku šest mjeseci od dana stupanja na snagu ovog zakona.

Ministar koji rukovodi kantonalnim organom uprave nadležnim za poslove zdravstva dužan je da donese propis iz člana 35. stav 1. ovog zakona u roku šest mjeseci od dana stupanja na snagu ovog zakona.

Član 53.

Gradonačelnik, odnosno općinski načelnik donosi pravilnik iz člana 42. stav 3. ovog zakona, u roku od šest mjeseci od dana stupanja na snagu ovog zakona.

Član 54.

Do donošenja propisa iz člana 25. stav 3 i člana 35. stav 1. ovog zakona primjenjivat će se:

- Pravilnik o stručnoj spremi i drugim uvjetima za obavljanje stručnog rada u organizacijama za fizičku kulturu ("Službeni list SR BiH", broj 16/87) i
- Pravilnik o zdravstvenom nadzoru lica koja se organizirano bave sistematskim fizičkim vježbama i sportskim aktivnostima ("Službeni list SRBiH", broj 30/82).

Član 55.

Lica zatečena na poslovima trenera i drugih stručnih kadrova u organizacijama u sportu, a koja ne ispunjavaju uvjete stručne spreme za samostalno rukovođenja stručnim radom iz člana 25. stav 3. obavezna su stjeći odgovarajući stupanj stručne spreme u roku od četiri godine od dana stupanja na snagu ovog zakona.

Ukoliko lice iz stava 1. ovog člana ne ispuni u roku od četiri godine uvjet u pogledu odgovarajućeg stupnja stručne spreme prestaje mu radni odnos, odnosno ne može biti angažiran na poslovima stručnog rada u sportu.

Član 56.

Postojeće organizacije u sportu, privredna društva i ustanove koje djeluju u oblasti sporta dužne su uskladiti svoja akta sa ovim zakonom, u roku od 90 dana do donošenja propisa iz člana 52. i 53. ovog zakona.

Član 57.

Danom stupanja na snagu ovog zakona na području Kantona Sarajevo prestaje da važi Zakon o fizičkoj kulturi ("Službeni list SR BiH", broj 24/91 i "Službeni list SR BiH", broj 2/93 i 13/94).

Član 58.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

**PREDSJEDAVAJUĆI SKUPŠTINE
KANTONA SARAJEVO**

Miro Lazović, s.r.

BROJ: 01-02-176/01
Sarajevo, 10. maja 2001. godine